

魂時百官勿為來祭之教臣等相顧惶惑不知所喻即覲該曹之批又以勿為隨駕為教臣等反覆思惟不勝未安之至常時君上舉動也大小百官無不隨駕況此罔極之喪永訣之辰自上有郊外哭送舉動為臣子者安敢有不隨駕不來祭之道理乎揆諸情義決不當然伏願還寢成命以安輿情 荅曰予不欲勞動百官卿等如是啓之當從之○管餉使成俊耆馳啓請督運毛營下送之糧戶曹請姑以海州應捧之米隨到隨運以救燃眉之急 從之○朔牌廳以號牌偽造罪人鄭惟勲父鄭楮上疏覆啓曰鄭崑壽以功在社稷之人只有一孫而今將絕祀誠可矜惻但偽造情跡似無可疑有司但當執法而已疏內辭緣勿施何如 荅曰法初首犯坐死宜矣但其祖父暨先祖鄭摠皆有大勲勞於國家今若繩以法律則非但勲廟祀絕抑亦有乖於宥及永世之誓宜從寬典減死照律更為議啓朔牌廳請如 上教議功照律○全羅道長水縣私奴金水弒其主伏誅○丁卯吏曹判書金瑬上疏乞解本職及無帶金吾之任蓋將以饋使西下也 荅曰卿勿控辭安心往來○夜東方良方有氣如火光○戊辰遠接使金瑬及從事官副應教鄭百昌吏曹正郎鄭弘溟副修撰李昭漢西下賜物有差百昌少年登第而為人輕安且有酗酒之病人目以